



Sesida dals

27 d'october 2020

Communitgà ils

30 d'october 2020

Protocol nr.

878/2020

Incumbensa Cahenzli-Philipp

concernent in rapport davart la povradad en il Grischun

Resposta da la Regenza

Tar il punct 1: La Regenza renconuscha il giavisch d'ina rapportaziun davart la povradad. Enconuschientschas fidadas davart la povradad e davart lur motivs èn indispensablas per prevegnir e per cumbatter cunter la povradad.

Ina rapportaziun detagliada davart la situaziun sociala (rapport davart la povradad) è vegnida examinada en il rom da l'elavuraziun dal program da la Regenza 2021-2024, è dentant vegnida validada sco main prioritara che auters champs tematics dal sector social (PS 2.2 Prevenziun e cumbat cunter la violenza envers dunnas e la violenza a chasa, PS 4.3 Promoziun da structures favuraivlas per famiglias). La raschun per quai èn stadas d'ina vart las resursas finanzialas e persunalas limitadas sco er il grond dumber da projects strategics currents tar l'Uffizi dal servetsch social (p.ex. program chantunal per la politica d'uffants e da giuvenils, strategia chantunala Dependenzas, tgira d'uffants complementara a la famiglia, digitalisaziun dals process tranter las vischnancas ed il chantun en il sector da l'agid social), da l'autra vart il fatg ch'i èn avant maun gia oz datas detagliadas davart la situaziun da povradad en il Grischun.

Dapi l'onn 2009 realisescha il chantun Grischun la statistica d'agid social sco enquesta cumplexsiva ensemen cun l'Uffizi federal da statistica (UST). Ils resultats da l'enquesta annuala vegnan discutads mintga onn tranter represchentantas e represchentants dal UST e da l'Uffizi dal servetsch social. En spezial singularitads chantunals vegnan analisadas pli profundamain en quest connex. La statistica d'agid social vegn communitgada a las medias en il rom d'ina communicaziun annuala, ed in tema vegn

mintgamai elavurà e preschentà. Puncts centrals dals ultims onns èn stads la structura da las personas che retiran agid social sco er uffants e giuvenils en l'agid social.

Tar il punct 2: En il rom dal "Program naziunal per la prevenziun e per il cumbat cunter la povradad 2014-2018" (oz: Plattafurma naziunala cunter la povradad) èn vegnids elavurads differents studis e rapports davart la povradad en Svizra. Questas enconuschientschas fundadas davart quatter champs d'acziun da la prevenziun e dal cumbat cunter la povradad (furmaziun, integraziun sociala e professiunala, cundiziuns da viver, monitoring) vegnan surpigliadas en la pratica. I n'è betg previs da definir ulteriurs champs da mesiras sin plaun chantunal.

Tar il punct 3: Tant sin plaun naziunal sco er sin plaun chantunal datti actualmain differents projects che vegnan a meglierar ils proxims onns anc vinavant la basa d'infurmaziun en il sector da la povradad. Sin plaun chantunal introducescha l'Uffizi dal servetsch social ina nova software per la gestiun dals cas. Quella duai pussibilitar il barat digital da datas tranter las vischnancas, il chantun, las clientas ed ils clients, procurar per in andament pli effizient e garantir tant pli svelt ina buna qualitat da las datas. Sin plaun naziunal è il UST en contact cun ils posts chantunals da statistica concernent in monitoring da la povradad. Il monitoring futur duai vegnir stabilì sin basa da tut las datas fiscalas chantunals. Plinavant lavura il UST vi da la modernisaziun da la statistica d'agid social.

Ord vista da la Regenza basta questa optimaziun da las basas d'infurmaziun per identifitgar a temp fauss svilups e per prender mesiras correspudentas. En vista al program da la Regenza 2025-2028 è la Regenza pronta d'examinar l'introducziun d'ina rapportaziun davart la povradad.

Sin basa da las explicaziuns propona la Regenza al Cussegl grond da refusar questa incumbensa.



En num da la Regenza

Il president:

Dr. Chr. Rathgeb

Il cancellier:

Daniel Spadin